

Hidajet Bišćević: EU je poslala ozbiljno upozorenje Balkanu

17 Oktobar 2012 12:38 (17 Oktobar 2012 12:39)

Neće biti pomjerenja datuma za ulazak Hrvatske u EU, smatra Bišćević

Sarajevo

Novinar: Faruk Vele

Generalni sekretar Vijeća za regionalnu saradnju (RCC) Hidajet Bišćević smatra da zahtjev šest zemalja Evropske unije (EU), da se, u slučaju zloupotrebe, državama Zapadnog Balkana ukine bezvizni režim, predstavlja krajnje ozbiljnu poruku.

Podsjetimo, zahtjev u vezi s ukidanjem viznog režima, koji su podnijele Njemačka, Francuska, Holandija, Belgija, Austrija i Luksemburg će biti razmatran 25. oktobra na sastanku ministara unutrašnjih poslova zemalja EU-a.

"Mislim da je riječ o jednom vrlo ozbiljnom pitanju i usudio bih se reći jednom vrlo ozbiljnom upozorenju. Ono, prije svega, proizlazi iz izuzetno snažnog naglaska koje evropske institucije, a onda i zemlje članice Evropske unije generalno daju pitanju vladavine prava i poštivanju obaveza u zemljama našeg regiona, posebno u zemljama koje se kandidiraju za članstvo u EU. Riječ je, dakle, o ozbiljnom upozorenju", kazao je Bišćević za agenciju Anadoluja (AA).

Dodaje kako treba vidjeti kako će se to pitanje dalje razvijati u kontekstu rasprava u evropskim institucijama.

"Ja bih rekao da je riječ o široj političkoj poruci, a to je da uzimanje obaveza mora postati nešto što će biti svakodenavna praksa i obaveza svih administracija na ovim prostorima. Moj dojam iz kontakata koje ja imam uz Birselu s evropskim institucijama, pa i zemljama članicama, jeste da su mnoge od njih čak i razočarane načinom na koji administracije na ovim prostorima preuzimaju obaveze, a onda ih olako zaboravljaju", tvrdi Bišćević.

Na pitanje da li to znači da će doći do ukidanja viza za zemlje Zapadnog Balkana, Bišćević odgovara da je "ovo svakako ozbiljno, ali da je teško predvidjeti šta će se u konačnici dogoditi".

"Takva odluka, promatranje takve odluke, mora se staviti u širi politički kontekst. Nema dvojbe da bi to bio težak udarac i teška politička poruka, posebno u svjetlu o napretku koji je nedavno dala Evropska komisija", smatra Bišćević.

Komentirajući mogućnost da Hrvatske ne uđe u Evropsku uniju 1. jula 2013. godine, kako je ranije planirano, Bišćević tvrdi da u evropskoj diplomantskoj praksi vrlo često dolazi do tog efekta lavine, gdje nekonešto izjavi, pa svi to komentiraju.

"Ja sam jučer bio u Podgorici na jednoj konferenciji gdje je zamjenik direktora za proširenje EK

Joost Korte vrlo precizno govorio o tome da Hrvatska još ima određenih obaveza, da ih je Hrvatska svjesna, te da je Evropska komisija svjesna da će ih Hrvatska ispuniti i da neće doći do pomicanja datuma za ulazak Hrvatske u EU.

<http://www.aa.com.tr/ba/headline/91579--hidajet-biscevic-eu-je-poslala-ozbiljno-upozorenje-balkanu>